

## Par vê vere autonomie un pat tra minorancis

Cheste volte no molin: i cuintriregionaliscj di ogni colôr a àn dîs mês di temp, prin des votazions, e no vuelin strassâju; in dîs mês la coce dai talians e po gambiâ une vore di sepis. Baste tignî dûr a colps di cjarte stampade e di peraulis gruessis: nol impuarte se lis lôr cjacaris no àn ni fondament ni veretât ni onestât. Il popul talian al è cussì indaûr che no si inacuarç di chestis trapulis; i dissidents di Cesaron (p.t. Cicerone) no cjalin la sostanzie des cjossis, a scoltin la musiche des peraulis. La plui part de nestre int ancje inscuelade e vîf inte plui nere ignorance di dut ce che al è fûr dai confins de Penisule. Provait a domandâ a un gjornalist, a un maiorent di partît, a un professionist, a un mestri, a un impiegât ce ordenament administratîf che e à la Ingletiere o la Austrie o la Olande o la Belgjiche o la Svezie, par no lâ fûr de vecje Europe, e o viodarêz se a san rispuindius alc di positif. Ma salacor a son bogns di dîus che lis Regjons a parin in tocs la Nazion e nus puartin indaûr di un secul: lu àn let sul sfuei!

La grande ofensive cuintriregionaliste e ven de bande de grande industrie liberâl in leghe cu la burocrazie centrâl. Tuart o reson che a vebin, si po ancje capî i scrupui e lis pôris di cheste int. Une volte sclapade chê "granitiche unitât" che e met dute la nazion intes lôr mans, no si sa mai dulà che si po lâ a finîle, par sutile che e sedi la sclapadure. Ce ur impuartial a lôr de unitât di spirt, di temperament e custum, che in Italie no je mai stade e no podarà mai jessi? A lôr ur sta tal cjâf la unitât e la vastitât de mangjadorie. L'ordenament regional stabilît de Cjarte Costituzionâl al garantîs che dut al restarà come prin: no conte, no si sa mai!... Cui che al lasse la strade viere par une mai fate, al sa ce che al lasse e nol sa ce che al cjate! (Magari par savê ce che si cjate, al bastarès molâ une voglade di là dai confins; ma il talian al è clostri par nature: nol fâs chest sfuarç!).

Dal rest, noaltris ur din reson, par un altri viers: ur din reson di jessi contraris ae regjon juste apont parcè che la regjon, come che e sarà imbastide in Italie no disberdee nuie, no comedie nuie, no zove nuie. E, in fin dai conts, no nus impuarte nuie che la metin sù o che no la metin sù: se i talians no vuelin vêle che a stein cence. Nancje noaltris in chê forme no volin vêle: ce fâ di jê? Cun chê panadute che e je la regjon a statût normâl no si salvin i dirits des minorancis (la storie ur à insegnât a no infidâsi ni des promessis ni dai zuraments ni dai tratâts dal guvier talian); no si concjin lis cjadenis de burocrazie, si lis doplee; ni si po diliberâsi dal malcostum, de camore, de disonestât, de invadence, de "talianitât" puartade ca dai forescj; no si po salvâ il nestri patrimoni di lenghe, di tradizjons, di usancis, di serietât, di caratar, la

nestre muse furlane, in sumis; no si difindin in nissune misure i nestris interès. Chê no je autonomie, e je une zumiele di pulvin butât intai vòi, a cui che al è cussì basoâl di lassâsal butât. Al baste fâ un freghenin di confront cui ordenaments di chês altris nazions che o vin nomenadis prin, par capîle.

E al è dibant che o spietìn i macarons di Rome, al è dibant che o sperìn che la centrâl nus moli alc di plui, di sô volontât. A Rome no si gjave un claut cence tanais: O vin une sole strade par cumbinâ alc di positif: chê di interessâ diretementri i stâts confinants par cont des minorancis de lôr raze restadis in Italie e par cont dai taliens restâts di là dai confins, in maniere di creâ une paritât di tratament par chescj e par chei. E su cheste strade no nus judaran mai i taliens di chenti, ma nus puedin judâ i slâfs e i todescs sogjets ae Italie e i taliens restâts di fûr. Cuant che nol zove lâ cu lis buinis al tocje lâ cu lis tristis; e se cualchidun lis cjape che se es tegni.

(josef marchet - Patrie dal Friûl / 1949)